



Nuuk 14. januar 2015

Inatsisartut suleriaasianni §37 naapertorlugu Naalakkersuisunit imatut apeqquteqarpunga:

Apeqqutit

1.

Nunatsinni sumiiffinni assigiinngitsuni aqqutigeqqusaasut avataanni motorilinnillu angallavigeqqusaanngitsuni ATV-nik ingerlateqarluni angalasoqartarnera Naalakkersuisunit ilisimaneqarpa?

2.

Nittartakkami hunting-greenland.com-imi allaaserisat assilisallu takuneqarsinnaasut aqqutigeqqusaasut avataanni, motorilinnillu angallavigeqqusaanngitsuni ATV-nik ingerlateqarluni angalasoqartarneranik takutitsisutut isikkoqarnerat Naalakkersuisunit isumaqatigaat? ¹

3.

Ilumoorpa Kangerlussuarmi Inatsisunik Nalunaarutinillu unioqqutitsinikkut pinngortitamik ajoquseerujussuortoqartarneranik Naalakkersuisut arlaleriarujussuarlutik nalunaarfigineqartarsimasut? Taamaattoqarsimappat: Tamatumunnga atatillugu Namminersorlutik Oqartussat qanoq iliuuseqarsimappat?

4.

Aaqqissuusseqqinniarnermi "sumiiffiit immikkut nakkutigineqartussatut isigineqartussat" suut tunngavigalugit taamatut isigineqartussatut toqqarneqarniarpat?

5.

Inuit ataasiakkaat suliffeqarfiilluunniit piniarnermut, aalisarnermut pinngortitamiluunniit angalanermut malittarisassanik unioqqutsitisut sakkortunerusumik pineqaatissinneqartarnissaannik eqqarsaatersortoqarpa?

6.

Ukiarmi nunatta avannaani "pisassanik killilersuiffiunngitsumik" pilersitsisoqarpoq. Tassunga atatillugu §37 naapertorlugu pissutsit atuutilersut pillugit apeqquteqarpunga. Taamanikkut Aalisarnermut Naalakkersuisuusooq apeqqutinut siullermut akissuteqarami nalunaarutigaa Nunatsinni Aalisarnermik Nakkutilliisut annertunerusumik nakkutilliilissasut. ² Tamanna suli pilersaarutigineqarpa, aamma taamatut suliaqarnermut Naalakkersuisunit aningaasaliissutit amerlineqarnissaannik pilersaaruteqartoqarpa

(Inatsisartunut ilaasortaq, Naaja H. Nathanielsen, Inuit Ataqatigiit)

¹ <http://hunting-greenland.com/gallery/>

² http://inatsisartut.gl/documents/para3637/2014/svar/184_nye%20forvaltningsomr%C3%A5der_najn_akissut.pdf

Tunngavilersuut

Ataasinngornermi januarip 12-anni nutaarsiassaqaqtitsivimmi "sermitsiaq.ag"-mi atu-arneqarsinnaavoq, ulluni makkunani piniarnermik aalisarnermillu nakkutilliisut aammalu alaatsinaattut nunnigussinermilu nakkutilliisut ukiumoortumik ataatsimiittut. Aalisarnermut Piniarnermillu Naalackersuisoq, Karl-Kristian Kruse tassunga atasumik nalunaaruteqarpoq aqqissuusseqqittoqassasoq. Nakkutilleeriaaseq nutaaq atulerneqarniarpoq ilaatigut immikkut nakkutigineqartariaqartutut isigisat aallaavigineqassamaarlutik. Allaaserisaq naapertorlugu sumiiffiit unioqqutitsisoqarfiusussatut ilimagineqarnerpaasut imaluunniit unioqqutitsisoqartarneranik pasillerfioreersut sumiissusersineqassapput, tamannalu aallaavigalugu iliuseqartoqassanersoq aalajangiivigineqassalluni.³

Qularnanngilluinnarpoq inuit nakkutilliisussaataasut angisoorujussuarmik suliassaqarlutillu akisussaaffeqartut. Aalisarnermik piniarnermillu pinngortitamilu angallanermik nakkutilliineq suliassaavoq ajornarluinnarpoq. Taamaammat immikkut isigisarialinnik toqqaniarneq paasinarpoq. Taamaakkaluartorli soqutiginaasaaq suut tunngvaigalugit taamatut immikkut nakkutigineqartussat toqqarneqartassanersut paasissallugu. Tamatumunnga ilaatigut pissutaavoq assersuutissaqarmat erseqqissumik unioqqutitsisoqartaraluartorluunniit pineqaatissiisoqartannginnera ilimanarmat.

Apeqqutima ullut suliffiusut qulit ingerlaneranni akineqarnissaat piumasaraara.

3

<http://sermitsiaq.ag/kl/kruse-aalisarnermi-piniarnermilu-nakkutilliineq-aqqissuuteqqindegassaag>